

佛說八大靈塔名號經

宋夏天譯經三藏朝散大夫試光祿卿明教大師法賢奉詔譯

爾時世尊告諸苾芻我今稱揚八大靈塔名號汝等諦聽當爲汝說何等爲八所謂第一迦毗羅城龍彌伽園是佛生處第二摩伽陀國泥連河邊菩提樹下佛證道果處第三迦尸國波羅柰城轉大法輪處第四舍衛國祇陀園現大神通處第五曲女城從忉利天下降處第六王舍城聲聞分別佛爲化度處第七廣嚴城靈塔思念壽量處第八拘尸那城娑羅林內大雙樹間入涅槃處如是八大靈塔重說頌曰

淨飯王都迦毗城 龍彌伽園佛生處
摩伽陀泥連河側 菩提樹下成正覺
迦尸國波羅柰城 轉大法輪十二行

舍衛大城祇園內 徧滿三界現神通
桑迦尸國曲女城 忉利天宮而降下
王舍大城僧分別 如來善化行慈悲
廣嚴大城靈塔中 如來思念壽量處
拘尸那城大力地 娑羅雙樹入涅槃
如是八大靈塔若有婆羅門及善男子善女人等發大信心修建塔廟承事供養是人得大利益獲大果報具大稱讚名聞普徧甚深廣大乃至諸苾芻亦應當學復次諸苾芻若有淨信善男子善女人能於此八大靈塔向此生中至誠供養是人命終速生天界爾時世尊復告諸苾芻汝等諦聽我今當說遊止國城及於住世而說頌曰

二十九載處王宮 六年雪山修苦行
五歲王舍城化度 四年在於毗沙林

二年惹里巖安居 二十三載止舍衛
廣嚴城及鹿野苑 摩拘梨與忉利天
尸輸那及憍睺彌 寶塔山頂并大野
尾努聚落吠蘭帝 淨飯王都迦毗城
此等聖境各一年 釋迦如來而行住
如是八十年住世 然後牟尼入涅槃

佛說八大靈塔名號經